

粵粵

西

偶

記述





述

粵

輯 敘 閔

叢書集成初編

(補印本)

粵述及其他一種

一九三九年十二月初版
一九六〇年五月補印

商務印書館出版

上海洪興印刷廠印刷

粵述

清 黃山閔敘奎瞿輯

廣西、楚越之交。春秋時，越伐吳，并有其地。北伐齊，西伐楚，與中國爭疆。自荆以南，皆屬於粵。周顯王時，楚滅越，吳起相楚，南并蠻越，遂有洞庭、蒼梧。是時，越諸邊疆皆屬於楚。其後，越人散處江南海上，各爲君長，有甌越、雒越之屬，甚蕃。故曰百粵。以揚州南境，又曰揚越。秦始皇利粵之犀象珠璣，乃使尉屠睢統五軍，監祿鑿渠以通糧道，殺西甌君譯吁。宋越人皆入叢薄中，與禽獸處，莫肯爲秦者。陰置桀驁以爲將，夜攻秦人，殺尉屠睢。秦乃發適戍備之。後王剪滅楚，乘勝略定楊越爲南海、桂林、象郡。粵以東屬南海郡。粵以西屬桂林郡，而慶遠、思恩、太平以達交州，俱屬象郡焉。秦末，趙佗遂王粵地。漢因封之。漢孝武帝平南越，佗孫光降，以其地爲蒼梧、鬱林、合浦郡，屬交趾部。其北爲零陵郡，屬荊州。吳仍漢制，分領於荆、交二州。其後析合浦以北蒼梧、鬱林郡屬廣州。晉以始安、臨賀屬湘州。宋齊因之，亦間有增改。梁分湘廣之交爲桂州，迄于陳隋，州郡因革紛如，莫可勝紀。唐以其地隸嶺南道，後分爲嶺南西道。領州郡三十有二，又開拓諸蠻崗落，置羈縻州郡數十。五代時入于南漢。宋平南漢，以屬廣南西路。領州二十，府二，軍五。元改爲廣西道，領路十有五，府一，州四，明分其地爲府八，土官府四，領諸州縣。後改思恩府爲流田州，府降爲州，而憑祥縣歸順崗、下雷崗俱改爲州。其領府九，轄州十二，縣四十六，土府二，土州三十四，土縣七，長官司四。地瘠而險，多山林谿崗，獠獞諸蠻連絡而居，視編氓蓋十之七。東連荆楚，山嶠綿亙數百里，而桂嶺復崛

焉叢立以環省城。由蒼梧度灘瀧，凡三百六十，乃至桂嶺。其高幾與衡嶽埒。北臨清湘，地始坦平。山川深秀，西北則牂牁、夜郎居其上游。山多險峻，水益湍急，控扼洞落，聯屬黔中。今貴州特其南洞壑濱江，以勾漏、

都嶠爲勝。西南多荒山大澤，村洞布濩，與龍編接壤，犬牙相錯。龍編，今交趾。源於興安，環桂林，經平樂至梧，是

爲離江，源於廣源。今交趾。經太平、南寧至潯州，與右江合，是爲左江。一曰鬱。源於峨利，與大理大槃水通，

今雲南。經慶遠、柳州，出大藤峽，是爲右江。即漢至夜郎肥水，一曰黔水。右江東流至梧，與離江合流，南入海，故梧當五嶺

三江之會，爲兩廣襟喉形勝重地，而統論方域，則東北楚也，其氣清淑，故其民秀而文。西南貊也，田州太平皆近雲南

交趾，故其氣瘴癘，故其民悍而質。北益多寒，故霜雪降焉。南益多暑，故蒸濕生焉。其地東抵湖廣道州界，

西抵雲南特麼界，南抵廣東高州界，北抵湖廣武岡界，東北抵湖廣永州界，東南抵廣東封川界，西北抵

貴州都勻界，西南抵交趾界。

桂林，秦郡也。漢爲始安，梁改桂州。唐曰建陵，後爲靜江軍節度。宋置靜江府，元改爲路，明改桂林府，而以

湖廣之全州、灌陽隸焉。領州二，曰全，曰永寧。古田縣改也。縣七，曰臨桂，曰靈川，曰興安，曰陽朔。全之屬曰

灌陽，故有理定。正統間省入永福。永寧之屬曰永福，曰義寧，故有脩仁、荔浦。宏治間改隸平樂。

柳州，秦桂林郡地。漢屬鬱林。孫吳析置馬平郡。梁置龍州，隋置象州。唐貞觀八年改柳州，謂地當柳星云。

天寶初改龍城。宋仍爲柳州。元置柳州路。明改府。領州二，曰象，曰賓。縣十，曰馬平，曰柳城，曰來賓，曰雒容，

曰羅城，曰融，曰懷遠。象之屬曰武宣。賓之屬曰遷江，曰上林。

慶遠秦象郡地。漢交趾日南之界。唐曰粵州。曰宜州。曰龍水郡。宋置慶遠軍節度。後爲府。明初以爲南丹安撫司。仍元舊也。尋改府領州一曰河池。縣所升也。縣四曰宜山。曰天河。屬州者曰思恩。曰荔波。

平樂秦桂林郡地。漢屬蒼梧。孫吳置平樂縣。屬之始安。唐置樂州。尋改昭州。天寶初爲平樂郡。其後仍爲昭州。元明俱爲平樂府。領州一曰永安。成化間以立山廢縣置也。縣七曰平樂。曰恭城。曰富川。曰賀。曰荔浦。曰脩仁。曰昭平。萬歷初置。故有龍平。後省入平樂。

梧州秦桂林郡地。趙佗據之。以封其宗人趙光爲蒼梧王。漢置蒼梧郡。交趾部刺史領之。晉曰永平。梁曰梁信。唐置梧州。宋元仍之。明改爲府。領州一曰鬱林。縣九曰蒼梧。曰藤。曰容。曰岑。曰懷集。屬州者曰博白。曰北流。曰陸川。曰興業。

潯州漢鬱林郡也。治布山縣。梁置桂林郡。陳改尹州。隋改鬱州。唐改潯州。復改潯江郡。元置潯州路。明改潯州府。領縣三曰桂平。曰平南。曰貴。故有橫州永淳縣。後改隸南寧府。

南寧漢之領方縣。屬鬱林。晉置晉興郡。隋曰宣化。唐置南晉州。尋改邕州。又改朗寧郡。又改建武軍節度。宋爲永寧軍。元爲南寧路。明改爲府。領州三曰橫。曰上思。舊土司也。曰新寧。舊爲四崗。縣三曰宣化。曰隆安。嘉靖七年。新建伯王守仁請置橫之屬曰永淳。

太平漢之麗江交趾郡地。晉以後西原蠻獠居之。唐爲羈縻州。隸邕州都督府。宋平嶺南。置太平寨。元爲太平路。明改府。領州三曰左。曰養利。曰永康。縣一曰崇善。皆以土司改流官者。

思恩、唐州也。治澄州止戈縣地。宋廢澄，益以賀水、無虞、上林，後併入武緣。土官岑氏歷代羈縻，明初歸附，授思恩知州。後陞爲府，其後改設流官，領縣一曰武緣。舊南寧屬于萬歷初改隸，故有鳳化縣，尋廢。

鎮安府在交趾之東界，有崗曰鎮安。宋置宣撫司，元爲鎮安路，明爲土府。國朝改土爲流，設通判一員，屬思恩府。

土司隸潯州者曰武靖州。成化間，韓雍平大藤峽，奏設也。隸南寧者曰思明府。曰憑祥州。曰下石西州。曰羅白縣。曰龍州。曰忠州。曰遷隆崗。曰果化州。曰下雷州。曰歸德州。曰湖潤寨。曰上石西州。曰利州。曰江州。曰思陵州。曰剝甘二十一村。隸太平者曰萬承州。曰太平州。曰安平州。曰龍英州。曰恩城州。曰結安州。曰都結州。曰上下凍州。曰結倫州。曰全茗州。曰茗盈州。曰鎮遠州。曰思明州。曰羅陽縣。曰陀陵縣。隸慶遠府者曰南丹州。曰東蘭州。曰那地州。曰忻城縣。曰永順正副長官司。曰永定長官司。隸思恩者曰田州。曰泗城府。曰向武州。曰奉議州。曰歸順州。曰都康州。曰上映州。曰鎮安府。曰上林縣。又九司一堡曰舊城司。曰興隆司。曰那馬司。曰古陵司。曰都陽司。曰下旺司。曰安定司。曰白山司。曰定羅司。曰何旺堡。故有祿州。隸思明。後沒于交趾。近又勘明復舊，改隸廣西。新置西隆州、西林縣。

灘水一曰癸水。桂林有古識曰：癸水繞東城，永不見刀兵。

范成大稱桂山之奇，平地崛然，千峯特立，玉笋瑤簪，森列無際，爲天下第一。卽衡嶽、廬阜、雁蕩、黃山、仙都、巫峽，皆所不及。今錄其尤著者。

獨秀山在桂林城中。峭立百仞。石磴盤旋。而上下有石室。顏延之守郡時。讀書其中。所謂未若獨秀者。巖峩郛邑間是已。

疊綵山。一曰桂山。在府城北。諸峯相屬。綵翠間布。其半有崗。透出山背。世謂風洞。

華景山。在城西北。下有洞。高廣數十間。屋前有橫塘。金波夕麗。上有臥龍崗。祠諸葛武侯。

伏波巖。在城東北。突起千餘丈。東挹初曦。下枕江水。有洞透出。相傳馬伏波征交趾。過此巖。傍巨石倒懸。去地一線不合。俗云伏波試劍石也。上有伏波祠。葉繼熙云。當是伏波將軍路博德。

七星巖。在城東。距江里許。七峯斗列。一小峯爲輔星。其洞曰棲霞。從山腹入。石級百餘。得平地。可坐數十人。有二岐路。一西行寬廣如通衢。高數十丈。兩壁石液如雪。卓杖於地。有聲如鼓。云其下又有洞也。半里阻大壑。不可進。一北行。僂入其中。尤高廣。鍾乳纍纍下垂。過里許。歧益多。云通九疑。遊人不敢進也。巖傍百步。有懸風洞。盛暑凝寒。下有冷水巖。澗水從石門出。源不可窮。宋元豐中。曾布帥桂。跨梁其上。故又名曾公洞。其左曰彈丸山。以溪石圓轉名之。有兩巖皆北向。左巖席布九筵。巨石倒覆如箕。右巖可三室。羽人棲焉。

龍隱巖。在七星之南。橫巖踞江。遊者刺舟石壁下。有大洞門。高百餘丈。鼓棹而入。仰視洞頂。龍跡夭矯。若印泥然。其長竟洞。北有巖曰月牙。石磴千級。半山之中。形如初月。清泉自山椒下滴。琮琤成韻。曰滴玉泉。石壁上有狄青平儂智高及元祐黨人碑。

屏風巖在彈丸東北二里許平地。斷山峭壁之下。洞門高廣百丈。其中坦然。可燕百客。仰視鐘乳融結。倒垂欲滴者無數。躡石磴上有穴可出。山川城郭。廓然無際。范成大命其洞曰空明。

灘山在城外東南隅。灘水經其下。山立水中。故又曰沈水山。又曰象鼻山。以形色似也。元常侍晦以音同。驪山改曰宜山。其麓有水月洞天。剖洞門透徹山背。頂高數十丈。圓若月輪。江水貫之。入洞如坐捲簾橋下。

雉山在城南五里。下枕江水。劉宋時僧棲顓居之。日誦法華經。有雉常來聽。一夕化去。因名之。有巖曰雉巖。深屈十餘丈。其東有山曰鬪雞。左右騰昂如欲鬪也。四壁削立。下插江潭。烟翠蒼鬱。着衣如染。有洞曰白龍。曰玄巖。出洞東南行里許。爲劉仙巖。宋道士劉仲達所居也。石室窻與上復高爽。玉池丹井。深不可測。西石潭曰曲斗。合于南溪。水面小蓮黃花。又名金蓮港。

隱山出城西三里。有六洞。曰朝陽。曰夕陽。曰南華。曰北牖。曰嘉蓮。曰白鶴。唐李渤出鎮所闢也。周迴相通。出此入彼。縈紆曲折。乍升乍降。窮奧爽塏。各極其致。舊在西湖中。今爲平陸矣。其北又有洞。曰南潛。曰北潛。北潛有石室。石臺。石果。作荔枝。胡桃。棗。栗狀。南潛乳石。纍纍垂地。有龍爪跡。俗云龍田。

中隱山在城西十里。亦名佛子巖。巖有三重。皆石也。其下者最廣。高百餘丈。上漸窄束。因石屋爲一小寺。倚牖四望。目極天表。暝雲歸鳥。皆從下飛。

虞山在城北里許。左濱灘江。舜祠在焉。有唐建中磨崖記。

堯山在城東北十五里。高廣延袤數十里。環桂之山皆石。獨此積土。松檜陰森。欲雨則雲烟四合。上爲堯祠田。共有十餘畝。曰天子田。田中石穴泉湧。曰玉泉池。至夏可溉田數頃。今山剪伐無餘。

辰山在城東北十里。有三巖。下巖初入昏黑。行十餘步始明豁。其石室可坐三十人。有扉西嚮。下瞰城野。緣磴至中巖。乳石奇絕。又至上巖。極目無際。羣山賓伏。溪流帶縈。變幻景態。不可名狀。

聖水巖在城東三十里。夜半則潮上巖。日中則潮下巖。略不愆期。水經注所謂朝夕塘也。

白鹿山在城南四十里。唐元康禪師騎鹿隱此。石磴數百級。至山腰有小寺。寺後奇石環列。絕頂有峯危立。若將壓焉。頽視羣山。合沓圍繞。青翠襲人。

眞仙巖在靈川縣西南三里。石屋穹窿。可容數十人。乳花凝結。如珠璣寶蓋。

仙隱巖在縣西南十餘里。磴道幽黑。秉炬可入。其中深廣。上若石樓。過數百步。有深潭在側。投之以石。聲若鳴鉦。

華巖洞在縣西南二十里。高廣數仞。清泉迴繞。相傳有桃片闊寸許。從洞中流出。石壁上有詩云。巖前流水無人入。洞口碧桃花自開。東望蓬萊三萬里。等閒歸去等閒來。

梵音洞在興安縣西南十餘里。石門甚狹。中極寬坦。石乳下懸。巖壁又有石筍石盤。泉聲琮琤若鳴鐘聲。乳洞與梵音相連。有上中下三洞。其中虛明。夏涼冬溫。清泉噴出。觸石有聲。左旋十餘步至中洞。地勢軒爽。有田數畦。常有烟霧出石罅。屈曲磴級。里許至上洞。淺水可步。秉火入之。石乳玲瓏。有巨石亘其上。又

有石柱高十餘丈。石皆五色。又有石牀石室。千態萬狀。宋李邦彥名其洞。下曰噴雷。中曰駐雲。上曰飛霞。□聖巖。在縣西十五里。前有山寺。唐僧雲嶠習草書處。中有雲嶠書堂。及滌硯池。其東曰月山。有穴如月。石康嶺。在縣西。周遭八十里。繞出縣背。泉源散落。灌溉甚遠。南有雙女廟。廟旁巨石突起五丈許。曰神石。罅裂寸許。禱雨。則以茅探罅。水隨茅出。少頃雲合雨至矣。

廖山井。在縣南鄉。抱朴子曰。廖扶家丹井數百口。飲之皆壽。其傍爲臨煙城。

羅漢洞。在陽朔縣南二十里。一名廣福巖。可坐數百人。中有複閣堂。殿兩傍丙舍疊若層龕。皆石也。有羅漢像。前有溪橋。乳石融結如獅象蓮花。范成大云。陽朔又有繡山。白鶴。華蓋。明珠諸洞。

湘山。在全州城西里許。峯巒葱菁。巖洞窈窕。有寺曰光孝。唐元和中。寂照大師住持其中。後涅槃焉。是爲無量壽佛。寺後有兩洞相通。曰穿心巖。巖有甲亭。延眺千里。如在圖畫。

柳山。在州北三里。舊曰北山。宋刺史柳仲塗讀書其中。更今名。山頂有源。四時不涸。中有飛來石。登其巔。則千峯萬壑皆在足底。宋州守林岳建湘山書院。前爲柳侯祠。井中有巨石。云乘風雨而入。昂首如龍。覆釜山。在州西八十餘里。七十二峯峭蒨峻絕。凌逼霄漢。有石如覆釜焉。壁立千尋。登者攀緣而上。頂有天馬佛足諸跡。有巖曰聖水。旱禱輒應。

礧巖。在州北十五里。虛明深邃。有飛泉百餘丈。白練縈紆。鳴響深越。中有石田石乳及佛像蓮臺。五彩炫燿。澗水貫巖直入。深不可測。

九龍巖在灌陽縣西十五里。中有沙河。水通別澗。石藤九枝。偃蹇蟠屈如龍。傍有九龍井。

華蓋山在永福縣。宋建隆間。有鳳來巢。聞於朝。發之得美玉。改名鳳巢山。其巔有池。曰玉液。

石魚山在柳州西南。小而卓削。形如立魚。山半有巖。曰立魚。巖東麓有泉。雷鳴。西奔洄洑。澗中多青綠異魚。

仙奕山在城西南。山上有穴。穴中有屏。有室。有宇。下有流石。如人物什器甚衆。磐石黑肌赤脉。十有八道。可奕。

新洞山在城西南十里。有洞高廣。可坐百人。石乳融結。紛成異像。傍穴以杖觸之。輒作鍾吼。

老人巖在融縣西南。峯巘削立千仞。時有老人拄杖遊憩其上。山半巖竇。劃然自開。高朗軒豁。然上下皆絕壁。登者必自山後捫蘿躡石。十步一息。乃至其地。臨巖頽視。毛骨洒淅。縱目天表。萬山皆在几榻。

眞仙巖在縣南六里。高峯怪石。青白相錯。溪水穿其中。玲瓏清響。如環珮。白石嵬然。天成一老子像。故又名老君洞。宋咸平中。頒太宗御書百二十軸。藏於內。張孝祥磨崖大書天下第一眞仙之巖。

葛仙嶺在賓州西。有洞深邃。可容數百人。宋乾道中。知州葛翁葺亭其上。因名。

五峯山在上林縣西。蜿蜒疊聳。五峯突起。上插霄漢。四時雲霧隱見。山巔有潭。有物蟄焉。中夜光燭數里。泊艦山在遷江縣北五里。巖洞高敞。下枕大江。石筍林立。江行者咸駐舟觀之。故曰泊艦。

會仙山在慶遠府城北。唐陸禹臣修真之所。藥爐丹竈猶在也。有洞曰白龍。石鱗夭矯欲飛。傍有青鳥。朱

砂兩山其觀曰聖壽曰真武殿曰八仙閣曰高昌井曰玉井

南山在府城南巖洞如屋軒敞逶迤中有石龍頭尾鬚鬣悉具因名龍隱前有光化寺御書閣藏宋真宗御書十六軸其左曰白雲巖

羅山巖在平樂府東八十餘里有清溪乘筏而入行數百步忽有隙通山端其上坦然可坐數十人避兵者多依之

感應泉在城北宋鄒浩謫昭州居仙官嶺每苦水遠汲負爲勞一日嶺下有清泉湧出因名曰感應泉將北歸數日前泉仍涸

穿巖在恭城縣西溪從中出舟行如在月中爽氣逼人

銀殿山在縣東北白雲四時覆其首望之如闕下有鐘乳六十二穿山在富川縣東有仙巖焉巖垂二石以挺撞之其聲一如磬一如鼓蒼藤數根如柱上下蟠之其巔石蓋五色狀如蓮花傍潭深不可測石梁亘其上

石門山在縣東三十里門僅容一人行四面峭壁不可上下其中則平原廣野居民百餘家

隱山在縣東六十里有巖曰潛德巖上鐫林公石牀四大字元豐二年林達夫識

犀泉在縣東北五十里平地石坎深約丈餘長三四丈闊可八尺泉伏其下上覆綠樹下列蒼石人至視之無有也拍手呼之則出不移時而滿旋復消涸如舊冬夏皆然

瑞雲山在賀縣西。高千餘仞。崦嵫鬱鬱。舊名幽山。唐刺史李邵更曰丹甌。宋守鄧壁以山多雲氣。改今名。上有泉注於池。曰仙池。

天門巖在荔浦縣之上崗黃村江。有小洞天如太極圖。曰太極巖。稍進爲拱辰巖。廣寒巖。雲壑深邃。探索靡窮。

火山在梧州城南隔江。其上有火光。中夜燭天。傳是南越王尉佗藏寶劍於此。又產靈鹿三足。有災祥則先鳴。山下有丙穴產嘉魚。

冰井在府城東南對火山。唐大歷三年。經略使元結爲之銘。

都嶠山在容縣南。有八峯。曰兜子。曰馬鞍。曰八疊。曰雲蓋。曰香爐。曰仙人。曰中峯。曰丹竈。而八疊尤特秀出。有南北兩洞。山徑紆迴。捫蘿而上。其上軒敞廣千餘尺。如片瓦鑄成。橫眺白雲。俱在足下。道書目爲第二十洞天。

朝巖在懷集縣西。可八十里。初入洞門。暝行三百步。繼而豁然高廣。仰穿巖背。石液融結如珠玉。虬龍芝蓋人物者無數。其後通燕巖洞。益開敞。燕巢其間。石平如砥。可布百席。乳花凝垂。斷而復續。姿態萬狀。不可殫述。

水月巖在鬱林州東南。虛明爽豁。石室如琅玕倒垂。澗水出巖中。澎湃有聲。循澗入洞。遊必列炬。跨木渡水。石勢益奇。西南爲天馬洞。有馬蹄跡。中益幽邃。又有均天洞。洞分三界。怪石臨潭。拊擊如作樂。

寒山、在州城北。九域志云：越王佗遣人入山採橘，十日方回，問之曰：「山中大寒，不得歸，因名山腰有龍洞，禱雨輒應，歷代皆賜敕封。」

綠蘿山、在博白縣西。綠珠生此，有祠。其下有綠珠井，云汲此水者，生女美麗。

將軍洞、在縣南。石門三重，飛泉二道，一溫一涼。石壁刻云：南州太守領將軍龐孝泰。

銅鼓潭、在縣北。潭深不測，巨石數十丈，臨之相傳有銅鼓沒其中。宏治己未，縣人得其一，送蒼梧制府。正德乙亥，又得其一，送縣。

勾漏山、在北流縣東北，可十五里。平川中，石峯突起，千百植立。洞在平地，不煩登陟。巖穴多勾曲穿漏，故名。前有靈寶觀，觀東有龍潭，泓洌幽闊，冷徹毛骨。後有太陽、太陰二小洞。榜曰勾漏洞天。玉宸真君及葛真人石像在焉。其東曰寶圭洞，秉燭入半里許，至水涯，循梯直下，擎竹筏以行，歷甕門數重，委蛇水際，益曠益幽。又有洞曰白砂，石膏玉液，散彩流光，簪井十數，皆產砂舊跡也。其西曰韜真觀，層石如重樓，複閣溪流映帶，觀西爲玉田洞、玉虛洞。巫山寨及普照、獨秀二巖，盤石青蒼，積水瑩澈，觸目皆非人境。

鐵城山、在興業縣南。石質黝黑如鐵，其中平衍，可隱數百家。石壁繚繞，險固如城。城有四門，惟東可通人行。南門有基四丈許，相傳避兵之所。上多寶穴，泉流不竭。其北有巖曰古州，高廣數丈，中有寒潭。石壁有元和十四年來遊字。

白石山、在潯州府城南六十里。其峯曰鵝頸，道書目爲第二十一洞天。巖洞窅遠無際，相傳通勾漏云。有

巖曰會仙。曰八仙。丹竈遺跡具存。有泉曰漱玉。聞鐘鼓聲則湧。羅叢山在城西南。有二大巖。東曰碧虛。西曰靈源。其最深處曰水月。上出罅光。下射泉下。宋二程先生讀書遺趾尙存。

閩石山在平南縣西北。峯巒翠嶺。石門流水。局若堂奧。五代梁嵩讀書其中。

南山在貴縣南二十四峯。蒼翠盤鬱。上有巖洞。仰視重乳。瑰奇萬狀。旁有石竇。遊者僂躬列火。宛轉攀緣十數里。方造其巔。巔有石室方丈。爽朗空明。指顧四遠。賓宣鬱白。四州之山。羅布焉下。相傳葛洪於此煉丹。丹井。丹竈及禮星壇尙存。

東山在縣東。明秀挺拔。唐何履何光隱於此。

陸公井在縣東南。吳鬱林太守陸續鑿也。南漢刺史劉博古種橘井旁。因名橘井。

寶華山在橫州之南。蜿蜒奇拔。其上常有寶氣燭天。瀑布自山巔飛落。形如白練。

月林山。一曰天窟。在州東。有石洞。洞口有潭。產嘉魚。洞有二岐。多怪石鐘乳。蟄燕巨蝠。至其盡處。有窟如軒窗。日光透注。

鳳凰巖在州東四十里。石壁臨江。巖半有翠房。房前有臺。其後石罅直達巖巔。空明掩映。穿出洞口。上有迎仙洞三字。

金榜山在隆安縣東南。石壁四周如城。有池。有塔。有石人。石盤。姚居易榜曰第一洞天。

獅巖在新寧州西北。半山有洞。高廣明豁。巨石覆之。傍有怪石。蹲踞如獅。行稍遠。益曲邃。更進復空闊。奇石萬列。由隙攀崖。流水潺潺。恍非人境。

白雲山在太平府城東。連亘如玉屏風。巖洞有七。而白雲最勝。洞口懸石。扣之作鐘磬聲。中夜有佛燈出入洞門。光燭數十里。下有白雲泉。

青蓮山在府城北。延袤綿亘三百餘里。峯巒紛矗。青翠相連。有巖曰青山。高闊百餘丈。深不可窮。石乳懸綴。仙蛻委積。遊者謂爲另一洞天。

金山在左州西北。巖曰通幽。奇峯錯峙。怪石環列。有流霞峯最高。登望無際。

柏嶺在州南中虛。可容百人。前有二潭。深澈莫測。後有臺若佛座。石乳懸垂。蓮華紛綴。

傳感山在州東南。一水澄涵。奇峯離立。阻水則浮槎以渡。左右小巖無數。皆可遊憩。臺閣曲房。皆架石天成。非意想所及。

白馬洞在上石西州中。幽邃阻水。遙望如隔銀河。及涉水。空明四達。懸石萬狀。不可殫述。

逍遙樓桂林府城東北樓也。下枕灘水。而挹堯山。夕陽初月。爽色滿座。唐顏真卿題曰逍遙樓。石刻猶在。至宋紹聖間。安撫使程節改曰湘南。唐人又於城東迤北建三亭。曰東山。曰拜表。曰碧潯。按唐宋之間有登逍遙樓詩。則名似不

始真
鄉

榕樹門古桂州南門也。相傳唐時所築。門上植榕一株。歲久巨至百圍。分根下跨。盤錯至地。若天成焉。元